

KINSA MAN KINI?



Panalanginan ka, igsoon. Nindot kaayo nga makaanhi sa balay sa Ginoo.

² Nagtoo ko nga nagtuon ako sa pipila ka Kasulatan, kaniadto, ug Kini nag-ingon nga sa dihang si Jesus nagkaduol na sa Jerusalem nga ang mga tinun-an miyahat sa ilang mga mata ug ilang nakita ang balaang siyudad sa halayo ug sila misugod sa pagsadya ug naga-ingon, nga, “Karon ang gingharian ipahiuli na.”

³ Ug kining usa ka tawo nga nag-ingon, o nagahisgot bahin sa usa ka bag-o niya nga pagbisita sa Palestina, ug miingon siya nga ang mga tawo karon, sa ulahing katuigan, miabot kono sa punto nga, sa diha ang mga tawo nakatungas na gikan sa walog ug gitan-aw ang palibot didto sa likoanan, sa samang dalan nga giagian ni Jesus ug sa mga tinun-an niadtong panahona, ngadtong pagkakita nila sa siyudad, misugod sila sa paghilak.

⁴ Kahibaw mo, nagtoo ako, adunay usa ka butang niadtong mga tinun-an, niadtong mga adlaw, mibati, nga—nga ang gingharian ipasig-uli na pag-usab.

⁵ Ug sa karon hapit na ang maong panahon. Ug ako nagtoo nga kana ang pagbati nga naa sa mga tawo, nga ang gingharian hapit na mapasig-uli pag-usab.

⁶ Si igsoong Neville, ang atong maloloy-on ug balaan nga pastor, bag-o lang nakigsulti kanako mahitungod sa umaabotay nga rebaybal dinhi sa tabernakulo, human sa pipila ka mga gabii, nga iampo kini. Ug giingnan ko siya, naghunahuna ko nga kini usa ka mapanalanginon nga butang.

⁷ Dili lang gayud mahimo nga aduna kamo’y daghang mga rebaybal. Ug daghang mga higayon nga aduna kita’y sayup nga opinyon mahitungod sa rebaybal. Ang rebaybal dili gyud aron nga magdala og bag-ong mga miyembro, kondili aron sa pagdasig sa kung unsa ang anaa na kanato. Ug ako . . .

⁸ Gusto kong isulti kini, tungod kay ginasulti ko kini gikan sa kahiladman sa akong kasingkasing. Nga nagbati ko’g lahi nga pagbati dinhi sa tabernakulo kaysa kung unsa ang gibati ko kaniadto sa hataas na nga panahon, usa ka pagbati nga—nga lawom nga espirituhanong pagbati, sama sa kaniadto, dugay na kaniadto; usa ka butang nga nagapapahiluna, ug adunay tinuod nga pundasyon. Ug nagasalig ako nga panalanginon sa Dios kining gamay nga iglesia, ug . . .? . . . pag-usab pinaagi sa iyang gahum.

⁹ Ug nakita nako ang nagapadayon nga programa sa pagpatukod og bilding, ug sa tan-aw ko usa kana ka halangdong

butang. Tungod kay, sa dili madugay, kitang mga tigulang magahubo na sa atong hinagiban ug itunol kini ngadto sa mga kamot sa atong mga anak, ug mosaka na nianang bulawanong Hagdanan.

¹⁰ Atong miaging adlaw ninglapas na ako nianang tunga nga marka, tungod singkuenta anyos na ako. Wala lang ko nakamatikod niana. Mora'g kanus-a ra sukad kadtong nagapanghakot pa ako og mga groceries para kang Chris Meisner, mga napulo'g walo, napulo'g unom, napulo'g walo ka tuig pa ang akong panuigon kaniadto. Paspas ra gyud ang panahon. Nagapakita lang kini nga dinhi wala kita'y siyudad nga nagalungtad, apan nangita kita og Siyudad nga umaabot. Ug kana mao ang Siyudad diin ang Dios mao ang magtutukod, ug wala na'y katapusan didto.

¹¹ Kaganinang buntag, samtang namulong ako bahin sa Mother's Day, ug ginahulagway ang atong inahan dili sa kung unsa siya karon, nga anaa na sa katigulangon, nga nangunot na, ug tanan nang ingon niana, nga siya aduna na'y saklay, o naka-wheelchair na, o arm chair, ug sa iyang tapad adunay usa ka gamay'ng masetasan sa mga bulak; kondili ang inahan nato nga anaa na sa pagkabanhaw, nga gipahiuli na balik sa iyang pagkabatan-on, ug nagatindog didto, nagasidlak nga sama sa usa ka rayna. Mao kana ang akong ganahan nga hunahunaon mahitungod sa akong inahan. Dili ko gustong hunahunaon siya sama sa kung unsa siya karon, nga tigulang na. Gusto kong maghunahuna sa umaabot. Ug nahibawo ko nga ingon niana pud kamo sa inyong mga inahan. Hunahuna siya nga kung unsa gyud siya sa iyang kasingkasing. Bisan daghang. . . sama sa giingon sa magbabalak, "Ang kinabuhi dili sayon alang kaniya, apan iya kining ikinabuhi pag-usab, aron lang nga aduna siya'y mabuhat alang kanimo." Busa ang Dios maghimo gayud og pamagi aron siya mabuhi hangtud sa hangtud uban kanimo. Busa nalipay ko niana.

¹² Wala ko kahibalo kung ngano, gihimo ko kini nga pahibalo, kaganinang buntag, nga mamulong ako karong gabhiona, kung itugot sa Ginoo, mahitungod sa: *Kinsa Man Kini?* Sigurado ko nga wala gayud ko nasayod kung unsaon nako ni. Kay okupado ko kaganina pa hangtud sa mga usa ka oras ug napulo ka minuto ang milabay, tungod sa mga interbyu sa tibuok hapon, ug adunay mga espesyal ug—ug mga tawag nga kinahanglan atimanon dayon. Mao nga wala nako kini nahatagan og panahon.

¹³ Ug gusto ko nga magpadayon kamo sa pag-ampo alang kang Doktor Sam. Siya—siya maayo na, ug mao nga mapasalamaton kita. Ug si Doktor Baldwin ug si Mrs. Baldwin parehong paayo na. Maulian na sila.

¹⁴ Gusto nako nga idugang ninyo sa inyong listahan sa pag-ampo, karong hapon. Si Harry Lease nga ania karon, ang

magbabaligya'g tambal. Si Harry usa nako ka personal nga higala. Sa hataas nga panahon nga nakaila nako siya, nagtoo ko nga siya usa ka Cristohanon, hangtud karong hapon, sa dihang naghangyo ang iyang lalaking igsoon alang sa kaluwasan sa iyang kalag. Si Brother Mike Egan nagdala sa . . . atong trustee dinhi, nagdala sa balita. Ug si Harry anaa sa usa ka seryoso nga kahimtang, didto sa ospital. Wala ko kahibalo nga ingon niana ang iyang pagtan-aw kanako; apan, iyang gibalibaran ang iya mismong pastor, karong hapon, o ang pastor sa simbahan nga iyang ginatambongan, ug gusto niya nga ako ang magbisita kaniya. Ug gusto ko siyang bisitahan. Busa, iampo n'yo si Harry.

¹⁵ Malipayon kita dinhi, karong gabii, nga mapaila-ila, ang akong mga higala dinhi, nga gikan pa sa Georgia, si Igsoong Welch Evans ug ang iyang pamilya. Nakita ko, usab, ang ubang mga bisita nga dili nako mga kaila, nga ania dinhi kaganinang buntag.

¹⁶ Kung wala ko masayop, nakita ko si Igsoong lalaki ug si Igsoong babaing Elmer Collins dinha sa luyo, nga taga-Phoenix, Arizona. Oh, wala gyud mo nagbag-o. Mora'g nagsuot ra gihapon mo'g mga sinina nga pang riles ug—ug gikan pa sa riles. Ug ginaabi-abi gyud mo namo sa inyong pagpauli dinhi! Dili ko puede nga hangyoon ko pa kamo nga magpabilin dinhi, tungod kay nakakita naman mo'g lugar nga mas maayo, kita n'yo, labing maayong lugar, Phoenix. Ako mismo, gustong mopuyo didto, sa umaabot nga mga adlaw.

¹⁷ Ug nakita pud nako dinhi si Igsoong Smith, gikan sa Church of God, didto sa gawas. Igsoong Smith, nahatag na kanako, ang imong gamay nga libro, atong miaging adlaw, o kagahapon sa hapon, hapon na. Wala pa nako kini mabasa, apan siguradong i-endorso nako kini, tungod kabalo man ko nga ikaw ang maoy nagsulat niini. Sigurado kong matuod, tinuod kini nga Kasulatan. Panalanginan ka sa Dios. Ug nanghinaut ko nga usa kini ka kalampusan.

¹⁸ Ug daghang uban pa, makaingon ko. Tanan kamo malipayong ginaabi-abi dinhi sa tabernakulo. Ug nalingaw ko niadtong kanta, kaganinang buntag, ni Igsoong babayeng Stricker nga, “Siya nagatan-aw kaniya, diha sa bintana'g rehas-rehas.” Ang akong Mennonite nga mga kaigsoonan dinhi, malipayon ko nga ania sila. Ug, oh, ang tanan kaninyo! Usa ka higala ko dinhi, sa pagtoo ko, nga taga Illinois, ang iyang anak nga lalaki naga-rekord dinha sa luyo, nahimamat ko sila pag-usab. Ug daghan kaayo, tingali ako. . . Ayaw hunahunaa nga gibalewala ko kamo kung wala ko natawag ang inyong ngalan, apan ginaabi-abi ko gyud kamong tanan.

¹⁹ Karon atong basahon karong gabii, alang sa leksiyon sa Kasulatan, gikan sa Mateo sa ika-21 nga kapitulo, sugod sa ika-

1 nga bersekulo, ug basahon nato hangtud sa ubos, ug lakip, ang ika-11.

Ug sa nagkahiduol na sila sa Jerusalem, dunay miabot, ug pag-abut nila sa Betfage sa Bungtod sa mga Olivo, duha sa mga tinun-an gisugo ni Jesus,

nga nag-ingon kanila, Umadto kamo nianang balangay sa atbang ninyo, ug didto ninyo makita dayon ang usa ka asna nga gihigot, ug ang usa ka nati uban niini: hubara ninyo sila ug dad-a dinhi kanako.

Ug kon adunay mangutana kaninyo, ingna lang siya, Gikinahanglan sila sa Ginoo; ug iyang ipadala sila dihadiha.

Nahitabo kini sa pagtuman sa pagsulti pinaagi sa profeta, nga nag-ingon,

Suginli . . . ninyo ang mga babayeng anak nga Sion, Tan-awa, ang imong Hari nagaanhi diha sa kaaghop . . . nga nagakabayo sa asna, ug sa nati nga anak sa asna.

Ug ang mga tinun-an milakaw ug ilang gibuhat ang gisugo kanila ni Jesus,

Ilang gidala ang asna ug ang nati, ug kini ilang gihapinan sa ilang mga sapot, ug mikabayo siya niini.

Ug ang kadaghanan sa mga tawo nanagpamuklad sa ilang mga sapot diha sa dalan; ug ang uban nanagpamutol ug mga sanga sa mga kahoy ug ilang gikatag kini diha sa dalan.

Ug ang mga panon sa katawhan nga nanag-una ug nanagsunod kaniya, nanagsinggit, nga nag-ingon, Hossana sa Anak ni David: Dalaygon ang nagaanhi sa ngalan sa Ginoo; Hossana sa kahitas-an.

Ug sa paghisulod na niya sa Jerusalem, naukay ang tanan sa siyudad, nga nanag-ngon, Kinsa ba kini siya?

Ug ang mga panon sa katawhan nanag-ingon, Mao kini nag profeta nga si Jesus nga taga-Nazaret . . .

Iduko nato ang atong mga ulo alang sa pag-ampo.

²⁰ Oh Ginoo, nahibulong kami kung unsa kaha ang among isulti, kung nabuhi pa kami niadtong mga adlaw. Apan kami nabuhi sa usa ka mas halangdon nga adlaw, sa dihgang kami nagahulat Kaniya nga moabot. Ug samtang nagapangandam kami, Ginoo, ginaandam namo among mga kasingkasing, ug ginadala ang tanang mga binangan nga ani nga among matigum gikan sa mga umahan, dinhi sa nasud ug gawas sa nasud, kami naghunahuna ug naghinamhinam sa panahon nga kami makakita Kaniya nga nagaabot, og nagasakay sa puti nga kabayo, nga nagapanaug gikan sa mga ganghaan sa Himaya, aron usabon ug hulmahon kining among karaan og madunoton

nga mga lawas, ngadto sa usa ka mahimayaong lawas nga sama sa Iyaha, diin wala na'y sala o wala na'y timailhan sa kamatayon ang makasulod. Ug makita na namo Siya kung unsa Siya, ug kami magkinabuhi, ug higugmaon Siya sa tanang kapanahonan nga moabot.

²¹ Ginapasalamatan Ka namo alang niining simbahan ug alang sa pastor niini, ug alang sa mga tinugyanan ug mga diakono, ug alang sa matag tawo nga nagatambong dinhi; ug alang sa mga bisita nga ania sa among mga ganghaan, nga mga karnero usab sa mao rang panon, apan gikan lang sa laing koral. Kami nagahangyo nga Imo silang panalanginan, karong gabhiona, sa Imong Presensya.

²² Ug pakan-a kami sa Imong Pulong, aron kami makalakaw gikan dinhi, karong gabhiona, nga may determinasyon nga mamahimo nang mas maayong mga Cristohanon kaysa kung unsa kami kaniadto. Hinaut nga manguli kami dala ang bag-ong paglaum diha sa among kasingkasing, ug may kalipay, nga nagahulat sa Iyang Pag-abot.

²³ Kung mahitabo man nga aduna sa taliwala namo, nga masakiton ug nag-antus, dili namo unta kalimtan ang pag-ampo alang kanila. Aron sila . . . Pagsulod nila sa bilding, karong gabhiona, diin kami nagkatigum alang sa pagsimba, kung misulod man sila, nga masakiton, hinaut manggawas sila nga mga himsog na.

²⁴ Ug mohangyo kami alang ngadtong mga nagpaayo pa, didto sa ilang mga panimalay ug sa mga ospital, ug sa kadtong mga anaa sa mga higdaanan sa pag-antus. Nagapangamuyo kami, Oh Dios, nga ang Imong kalooy magaabot kanila.

²⁵ Nagaampo kami alang niadtong mga walay pagtagad, karong gabhiona, nga wala pa makatila ug nakakita nga ang Ginoo maayo, nga wala pa mahibalo kon unsay kahulogan ingon nga hinigugma sa Dios. Dili lang gyud nila masabtan kung unsa ang wala kanila. Oh Dios, hinaut nga ang sibya sa radyo, o sa kon unsang paagi, matandog ang ilang mga kasingkasing, ug ang ilang mga pagbati mapahibalik nganha Kanimo sa dili pa masirado ang ganghaan sa kalooy ug sila masirhan, ug moatubang sa mga paghukom kon diin wala na'y kalooy.

²⁶ Tabangi kami, Ginoo. Kining mga butanga among ginaampo sa Ngalan ni Ginoong Jesus, ug alang sa Iyang himaya among ginapangayo kini. Amen.

²⁷ Naghuot na ang mga tawo kaniadto palibot sa mga ganghaan, ug puno na pud ang mga dalan, ug wala na'y dapit nga katulgan sa mga tawo. Nanghigda na lang sila sa gawas sa kuta, mga anaa na sa yuta, tungod kay paskuwa man niadtong panahona. Ug ang mga tawo nanganha nga gikan pa sa nailhang mga bahin sa kalibutan, aron magsimba niadtong panahona. Panahon kadto nga ang pasko nga karnero gipatay.

Ug ang . . . Kini nagrepresentar sa ilang pagkalingkawas gikan sa Ehipto, gikan sa pagkaulipon. Ug ila kining ginasaulog, matag tuig. Kada tuig, nagakahitabo kadtung dakung pagsaulog sa paskuwa. Ug usa kini ka labing talagsaon nga mga panahon sa . . . o kasaulogan sa relihiyong Hudyo, tungod kay nagpasabot kini sa panahon nga sila giluwat.

²⁸ Gusto kanang dumdumon sa tanang mga tawo, ang panahon nga sila naluwas. Daw sa ingon niana usab kita, karong gabhiona, gusto natong dumdumon ang panahon sa dihang giluwat kita! Daku kaayo ang kahulugan niini kanato!

²⁹ Mahinumdom ko usab sa akong kaugalingong kasinatian, kung giunsa pagpangandoy kaniadto sa akong kabus nga batan-on pa nga kasingkasing nga mahikap ang Dios. Akong nahunahunaan, “Oh, kung makaadto lang unta ako didto ug manuktok sa Iyang pultahan, ug makigsulti Kaniya sa makadiyut!” Ug, siyempre, nasayod na kamo sa akong istorya. Nagkuha ako niadto og papel ug lapis, ug misulat Kaniya, tungod kay dili ako makapakigsulti Kaniya. Ug ako nahibalo nga Siya nagpuyo sa mga kakahoyan, tungod kay nadungog ko man Siya, ug nakita ko ang Iyang mga paglihok didto sa kakahoyan. Ug aduna didto og usa—usa ka, karaan nga pamilyar nga agianan nga akong ginaagian kaniadto pag ako mangayam o mangisda. Nahunahunaan ko, “Ipapilit ko na lang kini sa kahoy, ug para kini kang Mr. Jesus.” Usa lang ka paagi aron kadto nga palas-anon mapahigawas gikan sa akong kasingkasing.

³⁰ Oh, nianang gabhiona, didto! Mahikalimtan man nako ang akong edad, dunay panahon nga malimtan nako ang akong ngalan, apan dili gyud nako makalimtan kadtung taknaa sa dihang giluwat Niya ako gikan sa sala. Adunay nahitabo, sa sulod nako, nga nakatabang kanako pag anaa ako sa makuyaw nga mga oras sa kangitngit. Niadtong takna sa akong pagkaluwat, ang kabug-at sa sala mibiya kanako, ug ako usa na ka bag-ong tawo. Ako bag-o na nga binuhat diha kang Kristo Jesus, sukad niadto.

³¹ Ug kining mga Judio, nagaadto didto, matag tuig. Ug aduna’y usa—usa ka tuburan sulod sa simbahan. Ug mokaon sila og—og tinapay, ug mapait nga mga utanon, ug nating karnero, ug sila moinom gikan niini nga tuburan sulod sa simbahan. Ug sila dungan silang magkasadya tungod kay ang Dios nagpakita man kanila ug kalooy. Busa, ingon nga panahon kadto sa paskuwa, ug dili lang nga paskuwa kaniadto, kondili usa kadto ka espesyal nga paskuwa.

³² Kabalo mo, adunay usahay nga kita moadto sa simbahan ug . . . Kanunay kitang ganahan nga mosimba, apan adunay mga higayon nga anaa gyu’y espesyal nga nagakahitabo.

³³ Ug kadto usa sa nianang mga higayon. Ang palibot puno sa kahinangup, sama sa karon. Ang tanang mga mata sa niadtong

mga nahigugma Kaniya nagbantay Kaniya nga mosulod sa ganghaan.

³⁴ Ug ako nagatoo nga kadto daku ang pagkapareho sa karon, kay kadtong mga nahigugma Kaniya nagatutok Kaniya. Ang palibot napuno sa kalauman.

³⁵ Sa dihang, kita nabuhi niining panahona, diin ang kalibutan sa tinuod lang, nahimo nang usa ka dakung baril sa pulbura. Ug ang siyensya nagaingon kanato, “Tulo na lang ka minuto ug magtungang gabii na.” Ug sigurado ko nga nabasa n’yo, sama kanako, niadtong miaging adlaw, kadtong istorya mahitungod niining heneral sa kasundalohan, nag-ingon, nga, “Kung aduna ma’y usa pa ka gubat, kini modugay lamang og duha o tulo ka minuto.” Ang mga nangaging adlaw sa pagpakig-gubat, ug paggamit og mga pusil, ug pagkalot og mga lungag, wala na kana. Nagaingon sila nga ang sunod nga gubat mahitabo lamang sulod sa duha o tulo ka minutos. Moabot ang adlaw, nga adunay tawong gubot ang hunahuna nga kalit lang masuko ug iyang paluparon ang usa sa niining mga bomba. Ug paggibuhat nila kana, aduna man kita’y mga radar nga, bisan asa, aron makabalos kita sa gilayon. Ang kalibutan dili gyud makalahutay niana.

³⁶ Ang tanang tawo niadtong paskuwa nahibalo nga aduna gyu’y butang nga mahitabo, apan wala sila masayod kung unsa kadto.

³⁷ Ug ingon niana usab sa karon. Halos ang tanan nahibalo nga aduna gyu’y gitakda nga mahitabo. Ang tanan nahibalo niana. Mahimo n’yong estoryahon ang makasasala, mahimo n’yong estoryahon ang magpapatigayon, mahimo n’yong estoryahon ang si bisan kinsa, ug, oh, usa kini ka magubot nga panahon alang sa kalibutan.

³⁸ Apan mahimo n’yo usab estoryahon ang usa ka lalaki o usa ka babaye nga nagahulat Kaniya nga moabot, ug ang himaya anaa sa ilang nawong, nga nagasidlak. Nagabantay sila alang nianang daku nga panghitabo. Busa ang tibuok palibot napuno pag-usab, sa pagpaabot nga aduna gyu’y mahitabo. Ang kalibutan wala nasayod kon unsa ang gikatakadang mahitabo, apan ang Iglesia sa buhi nga Dios nahibalo kon unsay mahitabo. Nasayod sila nga sa dili madugay motingog na ang trumpeta, ug makita nato Siya nga nagaabot, nagsakay gikan sa Himaya, diha sa usa ka puti nga kabayo, ug ang mga kasundalohan sa Langit nagasunod Kaniya. Ug kadtong mga nangamatay kang Cristo pagasagawon ug pagabanhawon aron sa pagsugat Kaniya didto sa kawanangan. Mao kini ang atong ginapaabot. Kana ang ginapangandoy nato.

³⁹ Ug gikasulti kanato nga ang mga kalag niadtong mga inahan, ug uban pa, nga atong gihisgotan kaganinang buntag, nga atua ilalum sa altar sa Diyos, nagasinggit, “Unsa pa ka

dugay, Ginoo? Unsa pa ka dugay?” Ginahandum ka sa imong inahan nga makita sama sa imong paghandum nga makita siya. Ug ang atong mga minahal sa kinabuhi gusto nga makigkita kanato ingon man usab kita nga gustong makigkita kanila.

⁴⁰ Pagkamaanindot kana nga panag-uban pag-usab, pagmoabot na Siya! Ang mahimamat ang atong mga minahal sa kinabuhi ug makita sila diha sa ilang lawas nga nabanhaw, ug gihimaya, ug nagalakaw-lakaw didto ingon nga mga manununod sa pagkabanhaw, nga makita ang ilang kinaiya, kung unsa kadaku ang pagkabag-o niini, ang kaaghup ug kamalinawon. Ug wala na’y mga pagdali-dali, mga paglumbaanay ug pagtinukmoday, kay aduna man kita og Eternidad nga magkauban.

⁴¹ Oh, kining puno sa kabuang nga kapanahonan, nga atong ginapuy-an, wala na’y panahon para sa bisan unsang butang, puro pagpanglimbasog, ug pag-indigay, ug pag-ilogay, aba, usa kini ka makalilisang nga adlaw.

⁴² Kaniadto, samtang sila nagpaabot nga naay mahitabo, makalolooy nga daghan kadtong atua na sa maong paskuwa pero wala gyud nakakita Kaniya. Bisan pa, nasayod sila nga aduna gyu’y mahitabo, apan wala sila makakita Kaniya.

⁴³ Mao usab kini ang mahitabo sa Pag-abot sa Ginoo. Adunay daghang dili-mahimutang nga mga tawo, karon, nga nasayod nga aduna gyu’y mahitabo, apan sila—dili na nila Siya makita. Kay Siya moabot man sa kahilom sa tungang gabii, aron sakgawon ang gamay’ng Iglesia nga nangandoy ug naghulat ug naghinaminam nga makita Siya. Mao kana sila ang Iyang anhion ug sakgawon. Daghan sa kalibutan nga nagapuyo diha sa kamadanihon sa kalibutan, ug ginabusog ang ilang mga kalag sa mga butang niini, dili gayud mahibalo kung unsa ang mahitabo, hangtud nga ang Iglesia human nang mipanaw ngadto sa Himaya, tungod kay moabot Siya sama sa usa ka kawatan sa kagabhion ug pagasakgawon sila. Busa makita nato mibalik lang kita sa mao ra nga kahimtang. Karon atong nahibawan, nga, kini nga mga pagpaabot, nga ang Dios nagaabot ngadto sa mga... Sa tibuok Kasulatan, mao ra sa gihapon. Nga sila... Kanunay Siyang nagapakita sa mga nagapaabot kaniya, kanunay sa mga nagahandum nga makakita Kaniya. Ug sigurado ko nga mao kana ang paglaum nga ania sa atong kasingkasing karong gabii.

⁴⁴ Mga unom na ka bulan ang milabay, siguro, nga ako nagpamatuod ngadto sa pipila ka mga tawo. Ug ako miingon, “Oh, kon hunahunaon kini, posibli Siyang moabot sa unsa mang oras!”

⁴⁵ Ug ang hinungdan nga nakaingon ko niana, naghigot ako niadto bahin kang Igsoong Bosworth. Sa akong pagduaw niadtong tigulang na nga balaan, sa dihang nabalitaan namo

nga siya naghimalatyon na, kawaloan-kapin na katuig ang panuigon, ako ug akong asawa miadto didto . . . aron makita siya sa dili pa siya mamatay. Naa ko'y kinahanglan nga isulti kaniya. Mahimuot ko nga maglantaw sa mga balaan sa dihang nagasulod na sila sa Himaya, ug kinahanglan nako siyang makita. Ug kami nagdali gyud sa pag-adto kaniya.

⁴⁶ Sa akong pag-abot didto, nagdalidali ko'g sulod sa pultahan, didto sa usa ka diyutay'ng suuk nahimutang ang maong tigulang nga patriyarka. Gipataas niya ang iyang ulo sa dihang nakita niya ako nga nagaduol. Iyang giunat ang iyang karaan, huyang na nga mga bukton, nga nagayatyat na ang unud. Ug gikuuptan ko niya. Ug gigunitan ko siya sa liog ug mitiyabaw, "Amahan ko, amahan ko, ang mga carro sa Israel, ug ang mga magkakabayo niini," kay siya usa man ka balaan, diosnon nga tawo.

⁴⁷ Ug ako miingon, "Igsoong Bosworth, gusto kong mangutana kanimo og usa ka butang. Nagatoo ka ba nga mamaayo ka?"

Ingon siya, "Oh, wa man ko'y sakit."

Ingon ko, "Nan, unsa may problema?"

⁴⁸ Ingon niya, "Mopauli na ako." Ingon niya, "Gikapoy na ko, ug gibudlayan na ako. Ug gusto ko nang Mopauli."

⁴⁹ Ingon ko, "Unya nasayod ka ba nga himalatyon ka na?" Ingon ko, "Naa ko'y ipangutana nimo. Kung balikan mo ang kapin sa kapitoan ka mga tuig nga pagpangalagad, unsa ba'y imong labing mahimayaon nga minuto? Mahimo mo bang isulti kanako, sir, ug isulti mo kanako kung unsa ang imong nasinati, sa dagan sa panahon, nga makaingon ka nga mao gyud ang imong labing mahimayaon nga oras."

⁵⁰ Kung maabot ko man ang iyang edad, dili gyud nako makalimtan, nga samtang ang iyang maitum nga mga mata nagatan-aw kanako, ibabaw niadtong antipara. Ingon siya, "Minahal kong igsoon, kini ang labing mahimayaon nga higayon sa akong kinabuhi. Wala ko'y mahunahunaan nga panahon nga mas mahimayaon pa kaysa karon."

⁵¹ Gitan-aw ko siya sa nawong, ug ako miingon, "Sir, nasayod ka ba nga mamatay ka na?"

⁵² Ingon siya, "Igsoong Branham, naghigda ako dinhi, nga nagahulat sa matag minuto nga Iya nang ablihan kanang pultahan ug moanhi, nga dad-on na Niya ako uban Kaniya." Angay'ng ingon-ana pagnamatay. Angay'ng ingon-ana pagmopanaw na.

⁵³ Ug sama sa nahibaloan n'yo na, nga, mga duha ka oras sa wala pa siya namatay. . . Siya, naghigda didto nga walay panimuot, sulod sa duha ka adlaw. Ug sa dihang nahiulian siya, mibangon siya, sulod sa lawak, ug misugod sa pakig-estorya sa iyang asawa. Dayon, sa kalit lang, mora'g nahimo siyang sihag. Ug siya nakiglamano, sulod sa tibuok usa ka oras o labaw pa, sa

iyang mga higala, nga dugay nang nangamatay mga kuwarenta o singkwenta ka tuig na ang milabay, nga iyang mga kinabig sa iyang simbahan. Nakiglamano sa iyang inahan ug sa iyang amahan. Hangtud nga siya. . . Ang kinabuhi mibiya na sa iyang lawas, mihigda sa unlan ug natulog, diha sa mga bukton ni Ginoong Jesus. Wala gyu'y sama sa pagpangalagad Kaniya, nga nagapaabot Kaniya.

⁵⁴ Ug samtang nakig-estorya ko atong tawhana bahin niini, ug gisulti kadto nga kasinatian, giingon ko kini. Ingon ko, “Sir, oh, dili ba pagkamahimayaon pagmakita na nato Siya? Oh, kung Siya moabot na karon!”

Ingon siya, “Igsoong Branham, ayaw hadloka ang mga tawo nga ingon niana.”

Ingon ko, “Unsay buot nimong ipasabot?”

⁵⁵ Ingon siya, “Oh, ayaw isugilon sa mga tawo nga ang kalibutan matapos na, o si Cristo moabot na. Nagapabalaka kini kanila.”

⁵⁶ “Oh,” ingon ko, “dili. Pasayloa ko. Sa mga nagapaabot Kaniya, kini ang labing mahimayaon nga balita nga ilang madungog, nga si Jesus hapit nang moanhi ug sakgawon ang Iyang Iglesia.” Ang pagkatigulang mausab na paingon sa pagkabatan-on. Kalipay na ang ihatag puli sa kasubo. Kinabuhi na ang ihatag puli sa kamatayon. Pagkawalay-kamatayon ang ibaylo sa matarung nga pagkinabuhi. Oh, pagkamanindot nga takna, nga mahibalo nga Siya magaabot!

⁵⁷ Nagahulat sila alang Kaniya. Nagapaabot sila Kaniya. Ug sa pag-abot Niya, atong makita nga adunay duha ka pundok. Ang usa ka grupo dapig Kaniya, ug ang usa batok Kaniya.

⁵⁸ Ug mao kana ang atong makita sa karon. Nga, ang Iyang pag-abot, kanunay mao ang nagabahinhin sa mga tawo. Sa matag higayon, pagmakaplagan nimo si Jesus, makit-an mo nga ang mga anaa sa imong palibot supak Kaniya. Si Satanas kana. Ug, karon, kung atong hunahunaon kini, wala kita'y makita og dakung kabag-ohan. Parehas ra. Ang mga tawo nausab, apan ang espiritu sa mga tawo wala mausab.

⁵⁹ Ug sa dihang mitan-aw sila sa gawas didto sa ganghaan ug nakita Siya nga nagaabot, nga nagasakay niadtong gamay, puti nga asno, dili ikatingala nga ang mga tinun-an misugod sa—sa pagsinggit, “Ang gingharian sa Langit miabot na!” Ang mga tawo nanagan sa pagsugat Kaniya, ug ang tibuok Jerusalem nanghugyaw. Aduna gyu'y sa kung unsang butang bahin niini, pagnagaabot si Jesus, kanunay kining makapahugyaw. Ug ang tibuok siyudad nanghugyaw. Ug sila—dili nila kini matago.

⁶⁰ Ug ang mga magwawali niadtong panahona kinahanglan mohatag og katin-awan mahitungod niining paghugyaw, tungod kay fiesta kadto sa paskuwa. Ug nangutana sila, “Kinsa man

Kini?” sa dihang ang tibuok palibot puno og paghugyaw, ug ang pag-abot ni Ginoong Jesus, sa Jerusalem, maoy mipuno sa palibot og mga pagpaabot, mora og kinahanglan mahibal-an sa mga magtutudlo kung unsa ang nagakahitabo. Mora og ang labaw'ng sacerdote nahibalo unta mahitungod niini. Ug mora'g ang tanang uban pang sacerdote nakahibalo na unta niini.

⁶¹ Ug walay bisan unsa man nga pagkausab niini, sa karon, tungod kay ang Balaang Espiritu mao ang nagapanguna sa Pag-abot ni Ginoong Jesus. Ug samtang ang Balaang Espiritu nagasugod sa pagkaylap sa tibuok kalibutan, ang mga kalayo sa rebaybal nagakaylap usab, bisan asa, dagkung mga ilhanan ug mga kahibulongan ang nangahimo, mga pagpang-ayo nagakahitabo, nanaggawas ang mga propesiya. Ningbalik pag-usab sa Iglesia ang tibuok katinguban sa apostolikanhong mga panalangin. Busa, kung unsa kini kaniadto, mao usab karon, nga ang espiritu sa dili magtotoo nagasinggit sa gihapon og, “Kinsa man Kini?”

⁶² Ang uban kanila mitoo kang Ginoong Jesus, sa pag-ingon nga Siya usa ka maayong Tawo. Ang uban kanila miingon, “Siya usa ka maayong Tawo.”

⁶³ Mao kana ang ilang ginaingon karon. Ginahimo nila Siya nga sama kang Napoleon, usa ka manggugubat. Ginahimo nila Siya ingon nga usa—usa ka George Washington, usa ka matitud-anon nga tawo. Apan Siya labaw pa niana.

⁶⁴ Namatikdan ba ninyo ang pagbasa sa Kasulatan? Miingon sila, “Kini usa ka Propeta nga gikan sa Galilea.”

⁶⁵ Ug mao sa gihapon ang ilang ginasulti karon, sa dihang nakita nila kining dakung paglihok sa Ginoo: nga ginabalik, ngadto sa pagkahimsog, ang mga masakiton ug ang mga nag-antus; ang makita Siya nga ginagamit ang Iyang Espiritu diha sa Iyang Iglesia, sa pag-ila sa mga hunahuna sa mga tawo; ang makita Siya nga ginabuhat ang samang butang nga Iyang gibuhat sa dihang dinhi pa Siya sa yuta, aron matuman ang Iyang giingon nga mahitabo; sigurado, ang mga simbahan ug ang mga tawo, nangutana gyud niini, “Kinsa man Kini?”

⁶⁶ Wala sila makasabot kung kinsa si Jesus, tungod kay wala ni usa kanila ang makaila Kaniya, pinaagi sa ilang mga eskwelahan. “Unsa bang seminaryo siya migikan? Unsa bang eskwelahan sa teolohiya ang Iyang gigikanan?”

⁶⁷ Ug mao usab sa karon. Kadaghanan sa mga tawo nga gidihogan sa Espiritu Santo wala miggikan sa bisan unsa unsa man nga seminaryo. Mga produkto sila sa kaugalingong pagpili sa Dios. Apan ang mga ilhanan ug ang mga milagro, ug ang mga katingalanan nga gisaad diha sa Biblia, naganunot niining gamhana nga Balaang Espiritu samtang nagalihok Kini taliwala sa katawhan.

68 Ug ang ilang ginaingon karon, “Asang eskwelahana sila gikan?” Pagsulod mo pa lang sa usa ka siyudad, aron sa pagpahigayon og usa ka rebaybal, “Unsang denominasyon ka sakop?”

69 Nagkaaduna ko’y usa ka pagpakighinabi niadtong Biyernes sa hapon, uban sa Romano Katolikong pari gikan sa Irish nga simbahan didto sa Louisville. Ug bag-o pa lang gani ko gipaila kaniya, usa siya ka maalamon nga tawo, ingon dayon siya, “Mr. Branham, unsa ka ba nga denominasyon nahisakop?”

Ingon ko, “Dili ko sakop sa bisan unsang denominasyon.”

Ug siya miingon, unya, “Giordinahan ka ba?”

Ingon ko, “Oo, sir.”

Ingon siya, “Kinsa ang nag-ordena diay kanimo?”

70 Ingon ko, “Ang Ginoong Jesus mihatag kanako sa Balaang Espiritu, aron isangyaw ang Ebanghelyo, ug maoy mihatag kanako og usa ka sugo.” Bueno, mao kana ang ordinasyon nga atong gikinahanglan.

71 Si Jesus wala gayud moingon sa Iyang mga tinun-an, “Panglakaw kamo ngadto sa . . .” Wala nako ginaway kanang mga butanga, apan human na ang adlaw sa mga niini. Wala siya nag-ingon, “Panglakaw mo, magtuon mo aron mamahimong usa ka ministro, sulod sa *ingon-ani ka dugay nga mga tuig*.”

72 He said, “Apan kinahanglan maghulat kamo dinhi sa Jerusalem, hangtud nga mokunsad kaninyo ang Gahum nga gikan sa kahitas-an.” Gisulti niya kana sa mga tawo nga dili makahimo sa pagsulat sa ilang kaugalingong ngalan. “Ug human niana, nga miabot na kaninyo ang Espiritu Santo, nan mamahimo kamong Akong mga saksi, dinhi sa Jerusalem, sa tibuok Judea ug Samaria, ug sa tibuok kalibutan.” Mao kana ang ordinasyon.

73 Wala kita’y rekord ni Jesus nga nagtungha sa unsa man nga eskwelahan, o migraduwar sa bisan unsang seminaryo. Apan, adunay daghang mga seminaryo nga gipatindog sa Iyang Ngalan, alang sa pang-relihiyon nga mga katuyoan, kaysa alang sa uban pang—uban pang butang nga ania sa kalibutan. Wala gyud kita og bisan—bisan unsa man nga rekord mahitungod Kaniya nga nag-eskwela. Apan, bisan pa niana, adunay daghang mga eskwelahan nga gipatindog sa Iyang Ngalan kay sa bisan unsa nga laing ngalan nga anaa ubos sa langit, ang maong mga eskwelahan. Wala gayud kita’y nahibal-an nga duna Siya’y gisulat nga libro. Apan, adunay daghang mga libro nga gisulat bahin Kaniya kaysa tanang uban pang mga literatura nga nasulat. Ug, sa karon, ang Iyang Biblia mao ang pinakapopular nga Libro nga anaa sa tibuok kalibutan, taliwala sa tanang mga literatura.

⁷⁴ Apan, nakita n'yo, niadtong adlaw sa pagduaw, sila misinggit, "Kinsa man Siya?"

⁷⁵ Kita n'yo, mokuha ang Dios og usa ka butang nga mora og walay kapuslanan, aron mohimo og usa ka mahinungdanong butang gikan niini. Mao kana ang nagapahimo Kaniya nga Dios.

⁷⁶ Ug sa diha nga nakita nila Siya nga miabot, nga nagasakay paingon sa ganghaan, ang uban kanila miingon, "Siya usa ka halangdon nga Tawo."

⁷⁷ Mao usab kana ang ilang ginaingon karon. Adunay mga eskwelahan sa teolohiya nga nagatudlo, sa karon, nga si Jesus kono usa ka halangdon nga Tawo, nga Siya usa ka maayong Tawo. Ang uban kanila moingon pa gani nga Siya usa ka propeta. Karon, kung Siya usa lamang ka propeta, o usa ka maayong Tawo, nan anaa ra gihapon ta sa atong mga sala. Siya labaw pa sa usa ka Propeta. Labaw pa Siya sa usa ka maayong Tawo. Pero bisan pa niana, usa Siya ka maayong Tawo. Ug bisan pa niana, Siya usa ka Propeta nga Dios. Apan Siya labaw pa niana. Siya mao ang Dios nga gipadayag diha sa unod, aron sa pagtangtang sa sala.

⁷⁸ Ug sa pag-abot Niya, nga nagasakay, daghan sa mga tawo ang miingon, "Siya usa ka mananambal. Oh, nakita namo Siya nga nagpabuka sa mga mata sa mga buta. Among nakita nga gipalakaw Niya ang bakol. Nakita namo Siya nga nag-ampo, ug nawala ang hilanat sa bata." Apan, ang, maong matang sa mga tawo nanagsunod lamang Kaniya tungod sa mga tinapay ug mga isda.

⁷⁹ Ug ingon niana ang kadaghanan sa mga tawo sa karon. Kung adunay mananambal, aba, sila—sila nagasunod Kaniya, ug Siya usa ra—Usa ra siya ka dalangpanan. Kung sila magkaaduna og sakit, sila moduol, ug moingon, "Oh, mahimo mo ba akong iampo, nga ayohon ako ni Ginoong Jesus?" Ug sa diha nga nakagawas na sila sa ospital, o nakabangon na sa higdaanan sa pagkamasakiton, nagabalik na usab sila ngadto sa kalibutan, sama sa usa ka iro sa iyang sinuka, o sa usa ka baboy ngadto sa iyang lunangan, sumala sa giingon sa Kasulatan. Ginasunod sunod lang nila Siya para sa kaayohan nga ilang makuha gikan Kaniya. Gigamit nila Siya ingon lang nga usa—usa ka totem pole, o—o usa ka butang aron nga—nga aduna sila'y makuha gikan Kaniya, ug wala sila naghunahuna nga moalagad Kaniya. Kana nga matang sa mga tawo nagapadayon sa gihapon karon.

⁸⁰ Adunay siyam ka sanlahon nga nangaayo kaniadto, ug ang usa mibalik aron sa pagdayeg Kaniya. O napulo ba kadto? Sila, ang usa kanila, mibalik aron sa paghatag og pagdayeg Kaniya, ug ang tanang uban pa kanila mipadayon lang, nga wala gyu'y pagpasalamat.

⁸¹ Ug kung ang mga tawo sa America, nga giayo pinaagi sa Gahum sa Dios, ibalik ang ilang mga kasingkasing ngadto sa

Dios, adunay mahitabong rebaybal niining nasud nga mupasira sa matag imnanan og makahubog, nga . . . Ang mga tindahan sa alak ug mga tindahan sa whisky mangawala na sa esena. Ang mga kasimbahanan mapuno. Ang mga sinehan mamahimong wala na'y sulod pag- Domingo sa gabii. Ug magkaaduna og rebaybal, sa tibuok niining nasod. Apan pag makita nila kini nga nagakahitabo na, ang mga butang nga ginabuhat sa Dios, magasinggit gihapon sila, “Kinsa man Siya? Kinsa man kanang nagaabott? Asa man diay sila gikan? Kinsa kana? Sa unsang awtoridad man Niya kini ginabuhat?”

⁸² Dili ko makalimot, didto sa Johannesburg, South Africa. Bag-o lang ako nakaabot niadto, mga traynta minutos pa lang ang milabay, sakay sa eroplano. Tulo na ako ka adlaw ug gabii sa kahanginan, kapoy na kaayo ko nga dili na maagwanta. Sila—ila akong gidala sa halapad nga tugkaran diin mga kalim-an o kan-uman ka libo ka mga tawo ang nagkatipon. Ug dihadiha nga pagkasaka ko sa entablado, ang Espiritu Santo . . . Nakita ko, nga nagapadulong sa maong lugar, usa—usa ka bus. Ug adunay nakasulat niini nga, “Durban.” Nakita ko ang usa ka batan-ong lalaki nga kinahanglan pang makiglalis ug mopahilayo gikan sa iyang amahan ug inahan, nga ang iyang usa ka bitiis unom o walo ka pulgada nga mas mubo kaysa sa usa. Nagsul-ob siya og puti nga kamiseta, nga adunay mga suspender nga nakakaw-it sa iyang karsones. Ug nakita ko ang maong batan-ong lalaki. Milingi ko pag-usab. Nawala na ang maong panan-awon. Ug dayon, pagkataudtaud, akong nakita kadtong Kahayag nga nagbitay ibabaw sa usa ka batan-ong lalaki, nga atua taliwala sa mga mananambong. Ug mitan-aw ko. Naghunahuna ko, “Mora’g nakita ko na siya sa kung asa.” Gitan-aw ko siya, ug kadto nga Kahayag padayon nga nagpaibabaw kaniya sulod sa pipila ka minuto. Ug naghulat ko sa tighubad nga hubaron ang sunod nga mga pulong. Dayon nakita nako ang maong batan-ong lalaki nga mitindog, gilabay ang iyang mga saklay, ug ang iyang unom-ka-pulgada ka mubo nga bitiis nahimong normal na sama sa usa pa.

⁸³ Ug giingnan ko si Mr. A. J. Schoeman; nga atua na sa Himaya, karong gabii. ingon ko, “Mr. Schoeman, isulti ra pag-usab ang akong mga pulong. Usa kini ka panan-awon.”

Ingon siya, “Okay.”

⁸⁴ Ug ako miingon, “Ang batan-ong lalaki nga naglingkod dinha nga nagsul-ob og puti nga kamiseta, ug mga suspender, gikan siya sa usa ka siyudad nga gitawag og Durban, nga mga kinse ka gatus ka milya ang gilay-on gikan niining siyudad, sakay sa bus. Ug kinahanglan pa niyang molayas sa iyang amahan ug inahan, aron makaanhi. Apan mitoo siya kang Ginoong Jesus, ug aduna siya’y usa ka bitiis nga unom ka pulgada nga mas mubo kaysa sa usa.”

⁸⁵ Ug milukso ang maong batan-ong lalaki. Atua siya, nga nagatindog, naninguha nga gunitan ang iyahang mga saklay. Ug ingon ko, “Batan-ong lalaki, giayo na ka ni Ginoong Jesus.” Ug dihadhiha mitungha ang unom ka pulgada sa iyang bitiis, ngadto sa pagka-normal, sama sa usa pa niini. Ug ilang gidala ang batan-ong lalaki ngadto sa entablado, ug gisusi siya sa mga doktor didto. Nakita na ninyo ang iyang litrato diha sa akong libro.

⁸⁶ Sa pagtindog ko didto sa pipila pa ka gutlo, nakakita ko ug gamay, berdeng sakyanan nga nagadagan didto sa dalan, ug midalin-as kini. Mibalintong kini, paatras, ug mibangga sa usa ka kahoy. Usa ka batan-on, bulagaw ang buhok nga babaye. . . nabali ang iyang likod. Ug ako miingon, “Nakita nako ang usa ka gamay, berde nga awto nga nabangga sa usa ka kahoy, ug ang maong batan-ong bulagaw ang buhok nga babaye nga mga dise-otso anyos pa ang edad nabali ang iyang likod. Siya anaa sa usa ka seryoso nga kahimtang.” Walay mitubag. Ug dili nako siya makita bisan asa niadtong halapad, daghan kaayong mananambong nga mga tawo. Ug mitindog ko didto sulod sa pipila pa ka minuto. Ingon ko, “Sabta. Kini. . . Ayaw pagduhaduha. Ang Ginoong Jesus kini, diha sa Gahum sa pagkabanhaw. Iyang gipadala ang Espiritu Santo aron ipadayon ang Iyang buluhaton.” Ug didto nakita nako ang panan-awon nga mitungha pag-usab. Ug dili nako makita ang maong batan-ong babaye.

⁸⁷ Sa kalit lang, diha sa akong atubangan mismo, atua kadtong Kahayag, ingon sa inyong nakita sa retrato. Ug mipabilin Kini dinhi. Milakaw ako paingon didto, ug atua siya naghigda, ubos ra diay sa entablado. Ingon ko, “Batan-ong babaye, giayo na ka ni Ginoong Jesus.” Ug misugod siya sa paghilak.

⁸⁸ Ang iyang inahan miingon, “Oh, ayaw! Ayaw siya sultihi nga mobangon!” Ingon pa, “Kung molihok siya, mamatay siya.”

⁸⁹ Ug ang batan-ong babaye milukso sa iyang mga tiil, nga nagasinggit, ug nagadayeg sa Dios. Ug ang inahan nakuyapan ug nahulog sa tiheras nga gihigdaan sa maong babaye.

Unsa man kini?

⁹⁰ Niadtong higayona, usa ka tawong kritiko ang mitindog didto, ug mitindog nga ang usa ka tiil diha sa usa ka lingkoranan, ug ang usa diha sa laing lingkoranan, ug miingon, “Ikaw, Amerikano! Ginahagit ko ikaw nga isulti kanako kung unsang Ngalan ang imong gigamit sa pagbuhat niini! Ug unsa nga denominasyon sa simbahan ka sakop?” Kita n’yo?

⁹¹ Mao ra sa gihapon. Wala nila masabtan. Wala sila nagapaabot alang niining mga butanga. Ang mga simbahan wala nagapaabot alang sa Pagbalik sa Ginoo. Ug ania ang Balaang Espiritu aron pamatud-an ang Iyang Pag-abot, aron matuman Kini. Daghan kaayong. . .

Mas gusto sa matag tawo ang kaugalingon niyang pamagi. Ingon niana kung unsa ang nagakahitabo kaniadto. Ang matag grupo adunay kaugalingong ideya.

⁹² Apan dili kana ang pangutana karong gabhiona. Dili kana mao'y akong ginahisgotan. Apan ang pangutana nga ginapangutana ko kaninyo, unsa ba'y inyong hunahuna Niini? May kalabutan kini kaninyo. Kinsa diay Kining nagaadto-adto sa mga nasud? Dili tawo. Ang tawo dili makahimo nianang mga butanga. Kinsa Kining nagabutyag ug nagasulti sa mga tawo, sama sa, "Ang nagalingkod *dinhi*, og *dinha*," ug lain-laing mga dapit sa tigum, sa diha nga ang mga babaye ug mga lalaki nga gidala dinhi, naghimalatyon na? Kinsa ba Kini?

⁹³ Kadtong batan-ong babaye nga misulod sa bautismohanang kaganinang buntag, nga tulo ka semana kaniadto, naghimalatyon na tungod sa carcinoma nga kanser, nagapuyo dinhi mismo sa Maple Street, si Mrs. Baity. Ug gipangutana nako ang tulo ka mga doktor nga kauban niya. Wala gyud kono siya'y kahigayonan nga mabuhi, aduna pa gyud siya'y upat o lima ka gagmay'ng mga anak, ug ang akong inahan naningkamot sa pag-atiman niining mga bata. Ingon ni mama, "Bill, dili na siya makauli pag-usab."

⁹⁴ Ug miadto ako sa iyang nahimutangan, ug ang Ginoong Jesus misulti, "MAO KINI ANG GINAINGON SA GINOO, kung siya mosimba ug mosaad nga magpabautismo sa Ngalan ni Ginoong Jesus, ug moalagad sa Dios, mopauli siya, nga giayo na."

Ug nangutana ko kaniya, "Buhaton ba nimo kini, gining?"

⁹⁵ Ug siya miingon, "Ang tanan nga imong gisulti, akong buhaton." Dihadiha dayon nawala ang iyang mga gibati sa lawas. Paglabay sa tulo ka adlaw, nakauli na siya, ug ang mga doktor wala'y nakit-an ni usa ka timaan sa kanser.

⁹⁶ Kinsa man Kining nagaanhi sa Ngalan sa Ginoo? Kinsa Kini? Ang Balaang Espiritu kini sa Dios. Unsa ma'y inyong opinyon bahin Niini? Unsa ang inyong opinyon, sa pagkaila n'yo sa inyong pastor? Ug sa paglingkod ko niining mga lingkoranan dinhi, ang mga tawo nga gikan pa sa gawas niining lungsod, nagalingkod usab dinhi nga adunay epilepsy, nagalingkod nga adunay... Adunay usa ka lalaki nga nagalingkod dinhi, sa kung asa man, usa ka igsoong Mennonite, dinhi mismo, usa ka nagaantus sa epilepsy. Wala gyud ko nakaila o nakakita man kaniya, wala ko'y nasay-ran og bisan unsa man mahitungod kaniya. Ug sa kalit lang, mga duha ka tuig na ang milabay, tingali, o mga ingon-ana, oo, duha na ka tuig, gitawag kini sa Espiritu Santo, ug miingon "MAO KINI ANG GINAINGON SA GINOO." Wala na gyud siya giatake sukad niadto. Kinsa man Kini? Kinsa Kini?

⁹⁷ Kining babaye naglingkod dinhi, niadtong miaging Domingo, niadtong miaging higayon nga ania ako, gikan pa

siya sa usa ka lugar didto sa Illinois. Pagkasunod adlaw... Naay usa ka daku nga tumor sa iyang lawas, nga makamatay. Ug ang pipila sa labing maayo nga siyensya sa medisina didto sa Illinois maoy nagdala kaniya ngadto sa usa ka bantugan nga klinika, aron maoperahan, pagka-Lunes. Ug naningkamot siya sa makatambong gyud dinhi. Wala pa ko makakita kaniya o nakadungog bahin kaniya, sa tibuok kong kinabuhi. Ug sa kalit lang, ang Balaang Espiritu milandong kaniya, ug Kini misulti kaniya kung kinsa siya, kon diin siya gikan, ug paga-operahan siya pagkasunod adlaw. Pila man ang ania dinhi kaniadto, ang nakasaksi niana? Ug mikaylap ang balita mahitungod niadto. Pagkasunod adlaw, sa dihang miadto siya sa doktor, gidala nila siya gikan sa usa ka klinika ngadto sa usa na usab ka klinika, ug wala na'y nakit-an nga timaan niini.

⁹⁸ Kinsa man Kini? Oh, Dios malooy ka! Kinsa man Kini nga nagabuhat niini? Makapangahas ka ba sa pag-ingon nga kini imong pastor? Dili gayud. Makapangahas ba kamo sa pag-ingon nga adunay kalabutan ang tawo niini? Dili gayud. Ang Balaang Espiritu kini, ang Espiritu nga atua sa atong Ginoong Jesus. Ug Siya magabalik aron hiusahon ang Iyang kaugalingon sa Iyang Iglesia, hapit na kaayo mao nga Iyang ginapakaylap ang Iyang dakung balaan nga Kahayag, aron tuboson, ug aron ibalik ngadto sa pagpakig-fellowship, ang Iglesia sa buhi nga Dios, alang sa Pagsakgaw nga haduol na. Amen!

⁹⁹ Kinsa ba Kini? Dili nako matubag ang inyong pangutana. Dili ko makatubag alang kaninyo. Pero makatubag ako para sa akong kaugalingon. Ug sa ibabaw niining sagrado nga pulpito, karong gabhiona, diha sa mga igdulungog niining, panon, ug mga—mga tinubos sa Dugo sa atong Ginoong Jesus, ginasulti ko kini gikan sa kahiladman sa akong kasingkasing. Dili tungod kay ako usa kaninyo, dili tungod kay lahi ko, kondili tungod nga ako usa sa mga tinubos nga gihugasan pinaagi sa Dugo. Nagatoo ako nga kanang mao ra nga Kahayag nga nagapaibabaw niini nga simbahan, karong gabhiona, kanang mao rang Usa nagapakita lang, pinaagi sa kinaiyahan Niini, nga si Jesus Cristo kini, sa porma nga Espiritu Santo.

¹⁰⁰ Ang si kinsa man nga nakahibalo sa Kasulatan, nahibalo nga si Jesus miingon, “Ako gikan sa Dios, ug ako moadto sa Dios.” Sa wala pa Siya nahimong unod, sa kaniadtong kauban Siya ni Moises didto sa kamingawan, Siya mao kadtong Haligi nga Kalayo. Ug sa diha nga si Moises nagtinguha nga makita Siya, Iya siyang gitugotan nga makita ang Iyang Likod. Ug si Moises miingon, “Mora kini’g Tawo.” Sa dinhi pa Siya sa yuta, usa Siya ka Tawo. Iyang gibuhat kaniadto ang samang mga butang nga Iyang ginabuhat, karon, pinaagi sa mga tawo nga Iyang tinubos. Mianhi Siya ug nagpakuha sa Iyang retrato. Unsa man kini?

¹⁰¹ Human sa Iyang kamatayon, paglubong ug pagkabanhaw, samtang nagpaingon si Pablo kaniadto sa Damasco, usa niadto

ka adlaw, ug usa ka dakung Kahayag ang midan-ag nga nagpapukan kaniya. Kadtong mga tawo sa iyang palibot wala makakita sa maong Kahayag. Apan gidan-agan Niini si Pablo, hangtud nga nabuta siya Niini. Nagkaaduna siya og problema sa iyang mga mata sa tibuok niyang kinabuhi. Ug siya miingon usa ka higayon, “Ug aron nga dili ako igatuboy tungod sa labing daghan nga kapadayagan, adunay gihatag kanako,” usa ka udyong sa unod, usa ka sinugo ni Satanas, aron sa paghasol kaniya. Tungod kadto sa daghan kaayo nga kapadayagan.

¹⁰² Ug sa diha nga si Pablo gipukan didto, sa iyang dalan paingon aron unta nga lutuson ang mga tawo nga naghimo sa maong hilabihang kasaba; usa ka pundok sa mga natawo na pag-usab, mga tawong gitawag nga mga erehes. Mibiyahе si Pablo paingon didto aron unta sa paglutos kanila, nga adunay dalang mga papeles sa iyang bulsa, aron sa pagdakop kanila ug sa pagdala kanila ngadto sa Jerusalem. Ug sa hapit na mag-udto, dihay usa ka kahayag nga midan-ag, nga nagpapukan kaniya, ngadto sa yuta, ug nahulog siya sa yuta. Adunay usa ka Tingog nga migikan niadto nga Kahayag, nga nagaingon, “Saulo, Saulo, nganong ginalutos mo Ako?”

¹⁰³ Ug si Saulo milingi, sa iyang buta nga kahimtang, mihangad. Ug makita niya kadtong daku, mahimayaong Kahayag. Ug siya miingon, “Ginoo, Kinsa Ka?”

¹⁰⁴ Miingon Siya, “Ako mao si Jesus. Gikan Ako sa Dios; Miadto ako sa Diyos. Gikan Ako sa Dios; Nagabalik Ako sa Diyos.” Ingon siya, “Malisud alang kanimo, ang pagtindak batok sa tinalinsang kahoy.”

¹⁰⁵ Usa ra ka kapadayagan mahitungod nianang sagrado nga balas, usa ra ka higayon nga maanaa nianang dapit, dili gyud mahimo nga dili mausab ang maong tawo. Ang usa ka tawo, sa dili pa niya matawag ang iyang kaugalingon nga usa ka Cristohanon, sa dili pa niya maipaila ang iyang kaugalingon, kinahanglan nga masinati niya una kanang luyo-sa-disyerto nga kasinatian, diin iyang nahimamat ang Dios, nawong sa nawong.

¹⁰⁶ Kay, sa karon, makabaton ka og bisan unsa na lang nga matang sa tubag. Pagmakita ninyo ang Ginoo nga eksaktong nagapamuhat kung unsa ang Iyang giingon nga pagabuhaton, ug ang maalamon nga mga teologo isasay ra Kini nga pasimang. Moingon sila, “Alang ra man kana sa laing adlaw. Kini alang ra man *nini*. O, Kini alang ra sa laing kapanahonan. O, sayup Kana.” Sama sa ilang giingon bahin kang Jesus, “Siya mao si Beelzebub, ang yawa. Siya usa ka manghihimalad.” Ug tanan na nianang mga butang, aduna lagi sila’y tubag.

¹⁰⁷ Apan sa diha nga ang usa ka tawo nahibalag si Cristo, ug nakita Siya sama sa nahitabo kang Pablo, o nasinati Siya, walay igong mga teologo sa kalibutan nga makahimo sa pagsaysay niana nga kasinatian palayo sa maong tawo.

¹⁰⁸ Mao kana ang hinungdan, sa karon, nga wala sila'y ingon niana nga kasinatian. Mao kana ang hinungdan nga dili nila masulti. . . silang tanan nagaingon, “Kinsa man kini? Unsa man Kini? Asa Kini gikan?” Wala sila'y matubag. Ngano man? Tungod kay, ang ila lang nahibal-an maoy usa ka teolohiya nga hinimo ra sa kung unsa nga simbahan. Dili “ang pagkasayod sa teolohiya” maoy Kinabuhi. Dili “ang pagkasayod sa Biblia” maoy Kinabuhi.

¹⁰⁹ Apan “ang pag-ila Kaniya” maoy Kinabuhi. “Ang pag-ila Kaniya” ingon nga imong personal nga Manluluwas, ingon nga Mao Ang nagpuno kanimo sa Iyang Presensya. Atua ka mismo sa dihang nahitabo kini. Walay bisan kinsa ang makailog Niini gikan kanimo. Walay bisan kinsa ang pasimang nga makasaysay Niini alang kanimo. Kung kana nga kasinatian mahitabo kanimo, maila nimo kung Kinsa Siya. Alang kanako, Siya mao si Jesus Cristo nga mao sa gihapon kagahapon, karon, ug hangtud sa kahangturan.

¹¹⁰ Kinsa ba kini nga nagapamuhat niining mga milagro? Kinsa man kining nagapamuhat nianang dagkung mga buhat? Ang magwawali ba? Si Oral Roberts ba? Si Billy Graham ba? Si Jack Schuler ba? Si William Branham ba? Bisan kinsa pa, wala sila'y kalabutan niini. Mga instrumento ra sila.

¹¹¹ Ang Espiritu Santo kini nga nagapahayag sa Ebanghelyo, nga giubanan og mga ilhanan ug mga katingalahan ug mga milagro, aron sa pagpaandam sa usa ka katawhan. Ang palibot napuno sa mga pagpaabot, ingon nga ang mga magtotoo nanaghulat nga Siya moabot.

¹¹² Ug ang uban nagaingon, “Nganong aduna man kini nga mga rebaybal? Nganong aduna ta niini? Magpahiluna na lang kita sa simbahan.” Aba, gikasulti na sa simbahan dinhi, nga, pagmasugdan na nato ang pagtukod sa bag-ong simbahan, miingon, “Dili na kita magkinahanglan og mga milagro. Dili na nato kinahanglan kining mga butanga. Kung gusto ninyo ang mga niana, didto mo sa gawas kon diin ang mga niana nagakahitabo. Dili namo kinahanglan ang mga niana dinhi.” Pagmous-us na ang Branham Tabernacle ngadto nianang ubos nga kahimtang, maunlod kini.

¹¹³ Kini nga iglesia gitukod diha sa mga sukaranan ug sa Gahum ug sa Ebanghelyo ni Jesus Cristo. Ug samtang nagapabilin kini nga tabernakulo, hinaut nga ang mahimayaon nga Balaang Espiritu makakaplag ug higayon ngadto sa mga kalag, aron maluwas, ug pun-on sa Balaang Espiritu, ug pagaayohon ang mga masakiton. Para kanako, si Jesus Cristo kini nga mao sa gihapon kagahapon, karon, ug hangtud sa kahangturan.

Mag-ampo kita.

¹¹⁴ Kung wala ka pa makaila kung kinsa Siya, nga wala pa masayod kung unsa gyud kini tanan, ug gusto nimo mahibal-

an, mahimo ba nga imong ipataas ang imong kamot? Ug iingon, pinaagi sa pagpataas sa imong kamot, “Tampo ako, Igsoong Branham, nga ako makaila Kaniya.” Ug panalanginan ka sa Ginoo. Ug sa tanang dapit, nakita nako ang inyong mga kamot.

¹¹⁵ Karon, Langitnong Amahan, among ginadala kini nga Mensahe, ug ang mga bunga sa mga tawo nga nagpataas sa ilang mga kamot, nga gusto nilang mahibaloan kung Kinsa Kini. Gusto nilang maila kining halangdon nga si Jesus. Nga, ang Iyang Pag-abot, ang pagkabanhaw, haduol na kaayo, nga ang mga masakiton nangaayo. Ug human kana mahitabo, miabot ang pagpropesiya sulod sa Iglesia, dayon ang mga gasa ug mga milagro na, hangtud nianang katapusan nga ilhanan. Ang sunod moabot, mao na ang Pagsakgaw, nga ang Iglesia pagasakgawon na. Ug kami, Ginoo, nga nagapahayag nga nakaila Kanimo sa Gahum sa Imong pagkabanhaw, kami nagahulat, ug nangandoy, ug nagahilak, ug nagapakilooy, “Umari ka na, Ginoong Jesus!”

¹¹⁶ Sakgawa na ang Imong Iglesia ug kuhaa Kini, dayon, Ginoo. Kay, sa dili madugay, pagapabuthon na sa mga tawo kining kalibutan nga Imong gibuhat aron pagapuy-an nila, tungod kay sila misupil man Kanimo. Wala sila nagtuon ug kalinaw, kondili pagpakiggubat. Wala sila nagtuon og pagkamatarung, apan nagtuon sila og pagpangdaut. Kung unsa nga dili unta sila mamahimong hakogan sa gahum! Ginoo, kanang gamay man gud nga bahin sa ilang kasingkasing nga maoy nagapahakog kanila sa gahum, ginatagbaw nila kini diha sa usa ka laboratoryo sa kung asa, aron bombahan ang ilang isigkatawo.

¹¹⁷ Ginoo, kung maamgo lang unta nila nga kanang gahum nga ilang gipangandoy mao ang Gahum sa pagkabanhaw sa Anak sa Dios, ang Gahum sa Balaang Espiritu nga makapabag-o sa ilang mga kinabuhi; dili aron nga pabuthan ang mga nasud, kondili aron bag-ohon ang ilang mga kinabuhi ug himoon sila nga Imong mga alagad.

¹¹⁸ Daghang mga tawo, ang nangatakdan na og lasangnon nga kabuang, ila kaming giisip ingon nga usa ka pundok nga “mga walay hibangaagan,” ug—ug ingon nga “mga erehes,” sama sa ilang gibuhat sa kaniadtong mga adlaw. Apan sa ilang pagbalik, nga nagmaya, nagapasalamat Kanimo nga ilang arang pas-anon ang pagpasipala tungod sa Imong Ngalan. Mao kana ang gibati sa Imong mga anak, karong gabhiona, Ginoo, sa tanang dapit. Nagmalipayon lamang kami.

¹¹⁹ Ang uban sa Imong panahon kaniadto misulay sa pag-ila Kanimo. Miingon sila, “Siya’y higala niadtong ihalas nga tawo, nga si Juan, nga migula sa kamingawan nga halos walay saput, usa lang ka karaan na nga panit sa karnero ang giputos kaniya. Usa ka ihalas nga tawo nga nagsalibay sa mga pulong, sa sidlakan ug kasadpan, ug miingon, ‘Gidaitol na ang wasay sa gamut sa kahoy.’” Ug miingon, “Siya usa ka—usa ka sumusunod

niya. Usa Siya ka ihalas nga tawo. Buang-buang Siya. Wala Siya sa Iyang hustong pangutok.” Ang supernatural nga ministerio nga nagauban Kanimo kaniadto, Oh Ginoo, nagbuta sa mga mata nila kaniadto.

¹²⁰ Ug mao usab sa karon: Kining gamhanan nga Balaang Espiritu nga nagmantala sa Pag-abot sa Ginoo, sama sa gibuhay ni Juan sa iyang panahon, nga nagbuta sa mga tawo, sa kadtong mga dili gustong makakita. Apan sa kadtong mga buot makakita, gipili Mo sila. “Ug ang tanan nga gihatag Kanako sa Amahan moari Kanako,” miingon Ka, “ug wala ni usa kanila ang malaglag. Ug pagabanhawon Ko sila sa katapusan nga adlaw.” Amo Kang ginapasalamatan tungod niini.

¹²¹ Ug kadtong nagpataas sa ilang mga kamot, karong gabhiona, nagaampo kami, Oh Ginoong Dios, nga Imong ipaila ang Imong Kaugalingon ngadto kanila, diha sa usa ka kasinatian, sa Gahum sa pagkabanhaw. Itugot kini, Ginoo.

¹²² Ug adunay uban dinhi tingali, nga wala nagpataas sa ilang kamot, apan, sa ilang kasingkasing, sila nahibalo nga sila nagkinahanglan niini. Nagaampo Ako nga Imo silang panalanginan, ug ihatag kanila ang tinguha sa ilang kasingkasing.

¹²³ Inigbiya namo niining bilding, karong gabhiona, hinaut manguli kami ingon nga nabag-o na nga mga tawo. Hinaut manguli kami nga may lahi na nga katuyoan kaysa aduna kami, niadtong pag-anhi namo, kung kini supak sa Imong Balaanong kabubut-on. Hinaut manguli kami nga aduna na’y determinasyon nga magkupert gyud sa mga sungay sa halaran, hangtud ang among kalag matagbaw nga kami aduna na’y kasinatian diha Kanimo, ug kami nakaila gyud kung Kinsa ang among ginahisgotan, tungod kay kami nakahimamat man Kaniya ug nakaila Kaniya, ug nakapag-fellowship Kaniya. Itugot kining mga butanga, Amahan. Ayoha ang mga masakiton ug mga nag-antus.

¹²⁴ Panalangini ang among hiligugmaon ug bililhon nga pastor. Dios, kami nagaampo nga Ikaw magauban kaniya ug sa iyang hiligugmaon nga mga igsoong babaye, sa diha nga ilang ginaawit ang Ebanghelyo, ug ginawali Kini sa ilang radyo.

¹²⁵ Panalangini ang mga bag-ohan nga ania sa among mga ganghaan. Ginoo, hinaut nga mogawas sila, karong gabhiona, nga may pagkadasig na sa ilang kasingkasing, ug may katuyoan nga sila, sugod niining taknaa, kung wala pa sila makaila Kanimo ug wala pa nangalagad Kanimo, kaniadto, hinaut nga sila mangalagad na Kanimo. Nahibalo kami niini, nga, “Ang tanang ubang butang mopaingon lang ngadto sa pagkawalay-kapuslanan, apan ang Pulong sa Ginoo magapabilin sa walay katapusan.” Itugot kini, Amahan.

126 Pasayloa kami, sa tanan namong mga sala. Ug hinaut nga magkita kami nianang dakung... [Blanko nga bahin sa teyp—Ed.]

Because He first loved me
And purchased my salvation
On Calvary's tree.

127 Karon, pagkahuman sa Mensahe, iduko nato ang atong mga ulo ug simbahan Siya, samtang magawit kita ngadto Kaniya.

I love Him,
Sa tibuok n'yong kasingkasing.

I love Him
Because He first loved me
And purchased my salvation
On Calvary's tree.

128 Pila man ang nahigugma gyud Kaniya? Ipataas ang inyong kamot, isulti kini pinaagi sa pagsaksi og, "Gihigugma ko Siya." Oh, dili ba Siya kahibulongan? Kabalo mo, ganahan gyud ko nga mamahimong sama niini ug moinom ra, sa unsa man nga paagi, diha sa Iyang Presensya. Ang Iyang Pulong, naipahayag na, naipugas na Kini ngadto sa mga kasingkasing. Ginatulid kita Niini. Ginapahisakop kita Niini sa Iyang Espiritu. Pagkanindot gayud nga simbahan Siya kung ingon-ana! Karon, sa inyong pagbiya sa simbahan, karong gabhiona, lakaw mo, nga ginasimba Siya.

129 Ug hinumdumi, niining semanaha, adunay panagtigum alang sa pag-ampo dinhi sa Miyerkules sa gabii. Ayaw kalimti ang sibya ni Igsoong Neville sa Domingo, o sa Sabado, sa alas nuebe, sa WLRP. Ganahan gyud ako nga maminaw kanila, dili ba? Ang quartet, o ang trio, nindot kaayo paminawon. Ako ug ang akong asawa, ug ang mga bata, among tanan gipagawas ang gamay nga radyo ug—ug gipalibotan namo kini, aron maminaw kang Igsoong Neville ug sa iyang sibya, ug sa iyang kahibulongang mga pulong, kung giunsa niya pagtuboy ang Dios nga iyang gihigugma ug gitooan. Ayaw isulti kini sa . . .

130 Kamong mga bag-ohan dinhi, kung wala pa kamo'y simbahan nga regular ginatambongan, ari mo ubani kami. Sultihan ko kamo, dili ko ginasulti kini ug tungod kay naglingkod siya dinha. Dili, sir. Gisulti ko kini, sa daghan nang mga higayon. Gihigugma ko si Igsoong Neville. Kini, una, siya usa ka teologo. Una gyud, anak siya sa Diyos. Ang sunod nga butang, mao ra gihapon siya kada adlaw. Kaila nako siya sa daghan nang mga tuig. Wala gyud siya nagbag-o, bisan gamay. Siya gihapon si Orman Neville, usa ka sulugoon ni Ginoong Jesus. Ug sa akong hunahuna naa siya'y . . .

131 Atong miaging gabii, nanawag ko, aron pangutan-on siya kung okey lang ba, sa iyang programa, kung makahatag siya

og bahin alang kanamo nga moanha ug mag-ampo alang sa mga masakiton. Adunay pipila nga misulod, kaganinang buntag, kabalo na mo. Ug gitubag sa iyang asawa ang telepono, ug akong giestorya kadto sa akong asawa, bahin niini.

¹³² Ug daku ang among pagpasalamat sa Dios alang sa iyang mahiligugmaon nga asawa ug sa iyang pamilya. Maayo gyud. Pagmakita ninyo ang usa ka ministro ug ang iyang asawa nga nagkasinabtanay, diha sa katam-is ug pagpaubos, mao kana ang nagapalambo pa sa simbahan. Nga mas nagakatam-is pa sa paglabay sa mga adlaw.

¹³³ Gihigugma ba ninyo Siya sa tibuok ninyong kasingkasing? Sige. Naa kita'y kanta alang sa pagbulagbulag nga atong ginakanta, *Take The Name Of Jesus With You*. Ug hatagi kami ang gamay nga chord, igsoon, kung aduna kini dinha sa libro. Ug atong kantahon kini nga kanta pagpapauli. Ug sa dihang atong kantahon ang unang garay niini, gusto natong molingi, maglamanohay sa usa'g usa. Sige. Hatagi kami og chord.

. . . the Name of Jesus with you,
Child of sorrow and of woe;
It will joy and comfort give you,
Take it everywhere you go.

Precious Name, O how sweet!
Hope of earth and joy of Heaven;
(Panalanganin ka sa Dios, igsoon.)
Precious Name, O how sweet!
Hope of earth and joy of Heaven.

Atong kantahon kini nga verse karon:

At the Name of Jesus bowing,
Falling prostrate at His feet,
King of kings in Heaven we'll crown Him,
When our journey is complete. (Dili ba
pagkamaanindot niana?)

Precious . . . (Bililhon nga Ngalan!) O how
sweet!
Hope of earth and joy of Heaven;
Precious Name (Bililhon nga Ngalan!) O how
sweet!
Hope of earth and joy of . . .

¹³⁴ Pila ang nakahinumdom pa sa atong hamubo nga kanta nga atong ginaawit kaniadto, *Don't Forget The Family Prayer?* Nahinumdoman n'yo pa ba kini? Dili ko . . . Thelma, kung kahibalo ka man ana, o ang chord, o dili? Atong sulayan kini kausa. Wala ka ba makahinumdom niini? Atong . . . Mahimo kong sulayan kini sa makausa dungan nimo.

Don't forget the family prayer,
 Jesus wants to meet you there;
 He will take your every care,
 Oh, don't forget the family prayer.


¹³⁵ Pila ba ang adunay pag-ampo nga tibuok pamilya? Maayo kana. Atong sulayan kini pag-usab. Ibalik ko kana dinhi. Ganahan ko ana. Karon dungan ang tanan:

Don't—don't forget the family prayer,
 Jesus wants to meet you there;
 He will take your every care,
 Oh, don't forget the family prayer.

¹³⁶ Oh Ginoo, nahisulat sa Kasulatan, nga ilang gikuha gikan sa lawas ni Pablo ang mga panyo o mga tapis, ug ang mga mahugaw nga espiritu namahawa gikan sa mga tawo, ug ang mga sakit nangaayo. Kami nagaampo, Oh Ginoo, nga sa samang paagi, maipakita nga ang mga niini, karong gabhiona, sa diha nga akong ipadala kini ngadto sa mga nanginahanglan ug sa mga masakiton. Didto sa kung asa dapit sa nasud, adunay nagapaabot ug nagahulat alang niini nga mahitabo. Nagaampo ako, Amahan, nga Imong ihatag kini sa Ngalan ni Jesus, ang Imong Anak. Amen.

¹³⁷ Karon ako magahangyo, samtang atong iduko ang atong mga ulo, kung ang atong labing bililhon nga Igsoong Smith dinha, gikan sa Church of God, kinsa atong nakita, sama sa atong Igsoong Neville dinhi, nga usa ka maunongon, matinud-anon, nga alagad sa Dios, Hangyoon ko siya sa pagpangamuyo og mga panalangin alang kaninyo, nga magpadayon hangtud niining umaabot nga semana. Panalanginan kamo sa Dios, hangtud nga magkita ta pag-usab. Igsoong Smith.

[Nagaampo si Igsoong Smith—Ed.] Oo, Ginoo. Itugot kini, Ginoo. Oo. Oo. Oo. Oo. Amen.

¹³⁸ Maglamano hay kamo sa usa'g usa. Malipayon nga pagbalik, sa tabernakulo. Panalanginan kamo sa Dios. 

KINSA MAN KINI? CEB59-0510E
(Who Is This?)

Kining Mensahe ni Igsoong William Marrion Branham, una giwali sa Ingles niadtong Adlaw sa Mga Inahan, Domingo sa gabii, Mayo 10, 1959, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org